

廣德州志卷五十

藝文志 表疏二

表疏 二

廣德不養馬疏

明 胡 廙

南京都察院右副都御史提督黃門六科事臣胡廙謹遵成法養一隅以廣至仁事切惟廣德州自有宋之季先經戚方之寇亂繼有兀朮之侵暴兵火屢遭人民流竄有城郭而無宮室有里井而罕人烟自我高皇駐蹕電見一方之困極於是革路爲州以省冗官之費全蠲征稅以俟戶

廣德州志

卷五十

表疏

一

口之充此皆高皇之至仁不棄一隅之小而欲生全以望今日之庶也數十年來民生頗遂而國稅寔加方今應天府溧陽縣以官馬寄養於建平縣民家嗣是襲僞爲眞率爲馬戶因而引溧陽之故事以分派於廣德夫建平之與溧陽疆域相接地形頗同草場湖泊亦可孳牧而廣德之與建平貢稅雖山川自異東距安吉長興則有尖山苦嶺諸險西抵宣城建平則有茅嶺爛石重岡南連甯國而車馬所不能通北接溧陽而鋪遞所不可設此則輿圖可查而志書可驗者也山坂上下嶺徑險峻猶有不可以牛

代耕者況可望其蕃息馬乎此皆高皇帝之所親歷御見以制爲定則者臣廣德人也臣言廣德養馬不便議者必有謂臣私其鄉土以眩聖聽伏乞寬臣以不避嫌之誅勅委科部等官詳視疆域細察民情俟其回勘方立規制定冊於部司勒碑於太僕俾後聖之遵守於陛下猶陛下之遵行於高皇者也則一隅之民萬世永賴而仁德被於無

疆矣

李志

改折漕糧碑

欽差整飭徽甯等處兵備兼理錢糧驛傳江西提刑按察

廣德州志

卷五十

表疏

二

司副使張爲山州溪流淤塞糧運難通懇乞聖明俯軫民瘼照例改折以遺公私永利事奉欽差總督漕運提督軍務巡撫鳳陽等處地方戶部尙書兼都察院右副都御史褚劄付准戶部咨該本部題四川清吏司案呈奉本部送准總理糧儲提督軍務兼巡撫應天等府地方都察院右副都御史朱揭據徽甯兵備副使侯應徵呈奉職批據廣德州申詳溪流淤塞難通舟楫兌運艱難議請漕糧姑容比例改折緣由奉批仰徽甯道議報奉經行據該州申稱卷查先據山州鄉民濮徵韋三品等連名呈稱本州山勢

高阜水源短淺自是舟楫不通國初人民稀少建倉滄湖渡離州三十里徵運糧米後漸沙土積沒溪流改倉建平縣離州百餘里肩挑背負踰山越嶺上納糧米奈緣溪流沙漲下至東夏埠許家灘七里灘囊沙聚水雇覓漁船零星短載百般艱苦及至交兌愆期屢坐敗事改倉水陽鎮離州三百里議申院道每米一石查訪豐歉米價隨之或徵銀五六錢或至七八錢上下給發里長前去蕪湖等處買米裝載水陽又二百餘里始得交兌三度改倉竟抵水陽水陽地屬宣城買米蕪湖蕪湖地屬太平皆非州屬買

米則騰踊高價插和沙土兌米則旗軍悍惡百計凌虐愚民身落他鄉控告無地幸十八年蒙恩折兌民困稍甦泣思直隸徽州六縣浙江甯紹兩府阻山隔嶺不徵本色俱蒙改折本州莫非王土莫非赤子萬山疊嶂實與徽州甯紹風土形勢相同乞憐一視同仁援例轉申照徽郡等處改徵折色如解倒懸等情據此已該本州目擊兌運事體委屬艱難念其百姓疾苦是以俯從酌議備陳下情申請今奉前因反覆細查本州會計老冊內開欽奉太祖高皇帝定鼎之初本州係是興王之地民糧全免惟官田納米

名曰官糧永樂年間民田每畝納借用馬草三觔成化年間奉各部劄奉王撫院議民田每畝科米一升二合折銀六釐名爲田畝銀以辦歲用物料官田夏徵麥絲冬徵官糧卽今之兌軍本色米也彼時始建水次倉於州之北三十里滄湖渡口應兌糧米每年在於冬末徵完次年季春後緣溪流沙淤水湧權宜兌運後緣人烟增集開山作地以至沙土愈多溪流愈淺遂於建平縣東門之外離州百里小民納糧尙稱繁苦再後沙壅直抵建平縣西之東夏南河嘴泥頭上許家灘十里灘等處溪流一線艘筏難通

交兌愆期隆慶年間運官自縊百姓受累且近例十月開徵十一月兌完隆冬水涸從此官軍安坐水陽不復再進建平勒令管糧官運米赴彼交兌苦不勝言萬厯年間該前任吳知州申明將本州改兌本色正米四千九百石每年於秋末照年歲豐歉議徵價銀給付糧里領往外江蕪湖等處買米雇船運赴水陽賃房寄頓聽兌無論雇覓賃錢之資卽船戶偷盜房主插和費難悉數兌米千石費亦什百且水陽原屬宣城非州所轄相離州治三百餘里軍民欺異糴買艱苦兌運刁難廣德民害至此極矣爲照漕

糧之設原係軍儲事體重大委難輕議但今桐民所苦非漕糧之爲害以兌運之爲害耳而今之所謂改折者亦非欲於漕糧正數之內望其有所減損也不過以兌運之米易而爲銀耳外江之價可以無問水陽之倉可以無置倉夫經紀可以盡革酒席常例可以盡廢無閒關跋涉之勞則民力休無需索刁難之艱則民財省況廣德兌米未及五千坐當萬山之中較與徽州形勢相同故民情援例及此勢在萬不得已合亟申乞比例題請永准改徵折色以垂不朽之惠等因覆申到道據此看得漕糧之設原係軍

儲重計其酌數而派擇地而徵者蓋爲民以養軍非因軍以病民也查廣德歲輸兌運米四千九百石國初建倉於州之北三十里後漸壅淤遂改倉於建平縣之東門復遭崩塞至萬歷年間始議蕪湖買米水陽交兌矣夫水陽屬自宣城離州有三百里之遙蕪湖轄自太平買米有萬千跋涉之苦自是桐民受困有不可勝言者查徽州與浙之甯紹池之石埭等府縣皆因河水不通兌運免派使國初廣德之河如今日之壅必不派徵漕兌使今日廣德之河如國初之通亦不敢議改折惟視舊河壅塞而輸納甚艱

兌運如故而民困已極此該州有比例之陳也本道竊謂糧爲國計議免固所以甦民而適有病於國民爲邦本改折固無虧於國而實大便於民以太倉四百萬石之廣而議改此四千餘米之零似屬可行乞賜題議遵行等因到職該職會同巡按直隸監察御史王議照漕糧關軍國大計兌運爲則壤正供自非阻山遠水郡縣不得免派兌糧非水旱重大災傷不得輕議改折匪特職叨督理奉爲法守凡都邑之有司遐邇之細民亦莫不知之稔矣其何敢徼非望之恩於明例之外哉惟視廣德一州兌糧不上五

千數不爲多而小民之疾首蹙額苦稱負累反視漕糧最多地方特甚此其所苦不在糧而在兌非百姓之敢愛其力而地勢之難爲也該州僻介浙直環山而治層巒複嶺道路艱阻原與徽之六邑池之石埭無異惟以山溪一衣帶之水稍通舟楫隨坐派漕糧四千九百石始建水次倉於滄湖渡離該州纔三十里而已民未稱病也其後耕鑿漸繁石岡沙積灘高水淺舟楫難通於是不得已改倉於建平縣東門之外離州雖百里而遙猶州轄也民亦未敢稱病也其後沙流易塞於是又改倉於甯國府宣城縣之

水陽鎮離本州三百餘里則甚遠矣其地又無米可買糧里攜金而告糴於太平府之蕪湖縣離水陽倉又二百餘里則益遠矣糴者多則米價常騰離鄉遠則人情欺異其間就賃浮溢之費插和竊盜之患欺凌措勒之虞種種荼苦不假言而可知也計其道路往返殆將千里約其冗費大都三石而致一石而民之勞苦姑無論焉大江以南民情之苦於兌糧未有若該州之甚者也職獨何心而忍不爲之惻然於懷乎所據援比徽州等處事例乞恩改折亦其勞苦呼天疾痛呼父母萬不得已而鳴也職惟徽州等

處事例猶其遠者也若蘇州之嘉定則固有見行之例矣嘉定以十萬而改折廣德以四千九百而改折其數之多寡至懸也嘉定以易米百里之郡城不便而改折廣德以易米數百里之蕪湖不便而議折其勢之難易又至明也漕糧多者既以幸改其於寡也何有易米本郡者既蒙體恤則易米遠郡者尤所宜憐故職等不忍坐視民艱竊冀廣德之民幸得比於嘉定之民也然使該州民困雖紓而於國儲有妨職等亦何敢後公家之急而先百姓之私第念該州兌糧四千九百石在歲漕四百萬石中特千分之

一耳倉庾減一分之米卽帑藏增一分之銀於坐派原額固無少損也且京師米價平常不逾五錢時貴不逾六錢若使照例正兌折銀七錢改兌折銀六錢是改折之直視支放折色之數每石常有一二錢之贏也不特於原額無損也而更於國儲有益矣下解一方之倒懸上無妨於國家之經制斯亦通變宜民之長計也伏乞敕下該部查照蘇州嘉定縣事例覆議上請行職等遵奉施行則桐汭之民世食吾皇上不費之惠含哺而祝聖壽於深山窮谷者當與天壤相爲無極矣等因備揭到部送司按查萬厯二

十一年九月內該應天巡撫都御史朱題稱蘇州府嘉定縣地土沙薄不產禾稻況疊罹災沴乞行改折已該本部覆奉欽依將本縣漕糧自二十一年起至二十三年止改折三年以後再行議處等因已經遵行去後今該前因查呈到部看得應天巡撫都御史朱會同巡按直隸監察御史王揭稱所屬廣德州界浙直之間山高溪淺舟楫難通國初建倉於滄湖渡離州稍近兌運稱便後改倉於建平縣離州雖賒百里猶屬州轄民未稱病繼因下流益塞復改倉於甯國府宣城縣水陽鎮離州三百餘里民皆告糴

於太平府蕪湖縣又隔水陽二百餘里蓋離鄉遠人情易欺發糶多米價自貴大江以南苦兌糧者未有若該州之甚也欲要比照嘉定縣改折事例將本州原額漕糧四千九百石原係改兌每石照例折銀六錢解抵京儲 公私一節爲照前項漕粟係供軍儲本難議折但該州在萬山之中距水次且遠背負肩挑小民素稱苦累撫臣具揭改折無非軫恤氓艱調停國計臣等再四參詳相應酌議恭候命下本部移咨應天巡撫都御史及咨都察院轉行應天巡按都御史將廣德州額派改兌漕糧四千九百石查

照嘉定縣近例准與改折三年自二十三年起至二十五年止每石照例折銀六錢遵照議當年徵完務同各屬本色一齊起解如果三年內毫芒無欠以後年分聽撫按另行具題覆請再折若使翫愒拖逋虧損軍需仍令百姓輸納本色并治該州印糧官違慢之罪本部移咨漕運衙門及咨南京都察院轉行南京巡視上江御史一體遵奉施行等因萬曆二十三年二月二十二日本部尙書楊等具題二十四日奉聖旨是欽此欽遵擬合驟行爲此合咨前去煩照本部題奉欽依內事理欽遵施行等因准此會同

欽差提督漕運鎮守淮安地方總兵官新建伯王議照該州漕運水次隔遠民稱苦累既經題請改折三年備咨前來除候派撥新糧全改折色外擬合通行遵照劄仰本道照依咨劄備奉欽依內事理即便轉行廣德州遵照將該州歲額漕糧四千九百石照例自二十三年秋糧爲始改徵折色每石六錢與同各屬本色一齊起解無容拖逋未便等因奉此又奉欽差提督漕運鎮守總兵官新建伯王劄付准戶部咨同前事行道即便轉行廣德州遵照將該州歲額漕糧四千九百石照例自二十三年秋糧爲始改

徵折色每石六錢與同各屬本色一齊起解無容拖逋未便蒙此又奉欽差巡撫兵部右侍郎兼都察院右僉都御史趙案驗准戶部咨同前事仰道即行廣德州將額派改兌漕糧四千九百石自二十三年起至二十五年止每石照例折銀六錢遵照議單務要當年徵完與同各屬本色一齊起解不許拖逋如果三年毫芒無欠以後年分聽該道查明通詳以憑另行題請再折施行奉此又蒙巡按直隸監察御史王案驗奉都察院應字四千三百十六號劄劄准戶部咨前事行道備行廣德州將額派改兌漕糧四

千九百石准其改折三年自二十三年起至二十五年止
每石折銀六錢俱要當年徵完務同各屬本色一齊起解
如果三年內毫無拖欠以後年分另行議請如有翫愒拖
逋仍舊輸納本色印糧官一併參治等因蒙此擬合驟行
爲此仰州官吏照依欽依內事理即將額派漕糧四千九
百石自二十三年起至二十五年止每石照例折銀六錢
遵照議單務要當年徵完與同各屬本色一齊起解不許
拖逋如果三年內毫芒無欠以後年分另詳本道以憑酌
議另行題折施行毋得違錯未便須至劄付者萬曆二十

廣德州志

卷五十

表疏

十一

四年丙申郡人李得陽夏良心立

碑現存
此案李志載
此多訛字今據碑錄

禁革里排碑

國朝

徐國相

爲里排困民勒石永禁事照得里役之設原屬明季陋規
設立里長編爲十甲而一甲之中又立排年一人輪年充
當催辦似乎任輕役小而奸豪恃頑抗納每累墊賠於是
經承有費差役有費科派雜項有費以及站櫃看倉解餉
兌漕種種賠費大半入官胥之橐而小民傾家破產甚且
流離死徙矣更有劣衿蠹棍包攬代充議貼銀一二百兩
不等此輩竟爾中飽且包納錢糧多勒耗費不肖官吏倚

爲腹心指一派十通同分肥故鄉愚視里役爲畏途而衿
蠹以里役爲生涯也夫充當里長之累不過一里一人猶
係一家哭而衿蠹包當魚肉花戶則係一路哭矣年深歲
久長此安窮前已通行禁革并頒限串之法令花戶自封
投櫃完卽給串歸農如有抗欠始行摘比一應錢糧并漕
南米豆悉令官徵官解永禁里排催交領解之弊至於花
戶田地遇有買賣推收於投稅印契之時卽令經承查冊
登註立爲過割以便按戶徵輸但此法利於民而不利於
貪墨之官吏利於急公之良民而不利於包攬之棍蠹爲

此再行嚴示刻石立碑永遠禁止此後如有奸蠹潑官陽
奉陰違或巧立里老糧長催頭單頭等名色仍踵陋習者
本官卽行嚴參胥役立拏處死斷不姑貸須至碑者

門志

案康熙丙辰學署刻石稱方伯徐公惠遍江南尤汲
汲於凋敝之鄉蓋州境環山礲瘠民貧財匱昔時戕
於兵困於牧灾於旱澇哀鴻中澤豺虎郊原者已非
一日公怒焉心傷加意軫恤如解餉至司舊有兌收
等費公勅庫平收毫無增加故吾州納戶輸糧皆自
封投櫃火耗全除楚中兵米鄰郡協解動踰數萬石

公憐廣德山陬不通舟楫獨蒙免派又製造戰艦需用櫻毛公以櫻非州產特惠蠲徵去年閩逆侵擾浙地大兵援勦擬從廣德抵武林州之童叟莫不驚駭以爲資糧扉履孰能支應公竟令由他道據此則公之有德於州正不僅在禁革里排已也

請畱漕備糶詳稿

乾隆四年六月

李國相

竊照廣德一州僻處萬山之中與徽郡接壤可耕之田無幾兼以水少瀦匯田皆瘠薄而生長其地者旣無車牛服賈之人又乏百工餬口之術所賴存活惟望歲耳休養日久生齒浩繁歲豐一年之收僅支一年之食上年偶值偏灾饘粥不敷荷蒙

皇恩憲德蠲賑並施加意撫恤得免流離今夏雨偶愆期而民情洶洶米不入市幸甘霖旋沛人心始定如此情形甚屬可虞蓋他州縣本地米糧不足猶可購之鄰封卑州則四塞之郡層巒疊嶂如城如圍舟楫不通輪輻難入雖有常平倉貯米無多若廣爲積貯赴遠購辦則運腳倍蓰步步艱難本地產米有限官若採買民必先受其困縱設法逐年漸有所積或經糶賑仍屬空虛總非經常不敝之

道苟遇大侵實無救濟之策江南全省中未有若卑州民食艱苦之獨甚者也急宜籲請變通曲爲調劑伏查卑州額徵漕糧倉廩遠設隔郡之宣城水陽鎮離州三百餘里俱係崇山峻嶺小民完納衝寒跋涉種種苦累不可枚舉明新建伯王守仁督漕會議獨與廣德一州改折勒碑現在後復照徵民受其困卑職於雍正十三年內請照徽郡改折之例剴切具詳蒙各憲垂慈并查潁海等十二州縣彙題奉部議駁未得施行今卑職因山州瘠苦倘遇饑饉勢不可支欲求有備無患不得不再請易積困之徵輸轉

爲利益無窮之定例也所有卑州額徵正耗漕米六千六百八十餘石照例冬徵敢請令民就近在於州倉完納收貯至次年四五月見青苗栽蒔之後再將所收之米照陸運維艱南米折色之例每石擬定中價連耗八錢八分糶變易銀交解道庫則正額仍是無虧在

天庾億萬倉廩亦不爭此數千百石而巖郡民食充裕百世無患矣卑職嘗聞利不什不易制此一舉而實有五利存焉敬爲憲臺陳之免小民數百里嚴寒跋涉之勞一倍糜費數倍之苦紓民力而惜民財其利一也山州旣無外

來之米接濟產米只有此數畱六千餘米則益一萬餘穀
縱遇大侵加以常平舊有積貯可保無虞其利二也每年
四五月正當青黃不接之際米價騰貴今照定價八錢糶
變易銀小民沾惠無窮其利三也本地既有此數千餘米
免赴遠郡採買搬運盤撥多糜國帑其利四也廣德界連
浙省孝豐安吉等處其間林叢山峻宵小易於潛匿冬季
每多竊發印官既不在水陽遠郡收漕可於本地彈壓其
利五也欣逢我

皇上宵旰憂勤時以民生爲念凡有地方積弊積累無不

廣德州志

卷五十

表疏

十五

軫恤蠲除一遇水旱偏灾卽

詔下截畱漕米動經數十餘萬惠澤頻施有加無已誠千
載一時之遇卑職身爲民牧見地方有如此真切之情形
民生有如此永遠之利賴不得不披瀝籲請伏乞憲臺俯
察垂照據情題請

李
志

建平請改漕米兌運秬米文卷

茅成鳳

爲劇陳民累等事該建平縣知縣茅成鳳看得建邑漕糧
正米三千一百石耗米九百三十石全書開載並無註定
稞秬字樣則知任土作貢之意從其地之所出原未令其

舍所有之秬米而必責之以所無之粳米也乃起運之時舊例必以純粳兌給若地土可以種藝無難栽粳以應輸將其奈種之以粳而秋成收穫仍復變爲秬米地性使然自非人力之所能爲者是以每屆開徵之期各花戶只得以秬穀遠運鄰封產粳之處四散變易彼地之人往往乘建民之急故意指捺任其高擡時價然此猶不過一糶糶之間有虧折之苦而已其所最難堪者建邑山陬不通舟楫往來皆崎嶇之路小民背負驢駝有數十里百里之外不等屆在寒冬雨雪之時每遭跌仆傾散之患千辛萬苦

得購粳米而在途泥污水浸不能交倉其間困累情形種種難盡此闔邑士民所以屢次悲號而不得已也前者恩蒙具題請以本地所產秬米兌運部覆以遵行年久未邀俞允但查江南淮揚鳳廬等處漕米久運純白後奉

恩旨隨其地方所出不論紅白一體兼收是皆因時制宜以從民便原未嘗以其年久而不爲之計也又安甯等屬現以秬米兌運鳳淮等處尙有運粟者蓋以粳秬之名雖殊而運至京通並無區別且粟米尙可兌運何況秬米較之粳米均係一類者乎今據士民環庭泣訴前來合爲據

情具詳伏懇憲臺卽賜轉詳題請俯將建邑漕糧准以本地秬米兌運以免易稞購辦之苦庶一轉移之間而闔邑生靈得與淮揚廬鳳之民共沐

皇恩於無極矣等情呈詳到道據此該督理江安糧道參政鮑復昌看得漕糧上關

天庾重計何敢輕議更張然事有無虧於國計而實有益於民生者又不得不爲之變通似未可因其年久而遂因循積困致令小民永無復甦之日也查建平縣額徵漕糧正米三千一百石耗米九百三十石原以稞米兌運因該

廣德州志

卷五十

表疏

十七

縣從不產稞止產秬穀卽插蒔之時以稞稻作種而收穫之際仍復變爲秬米蓋地土之性使然每逢徵收漕米小民必遠赴他郡採買購辦之資無出不得不將本地土產之秬米易價而鄰封市鎮富戶乘建民之賣秬買稞故爲高價措勒建民受買稞之患鄰民獲壟斷之利且購備數千石之糧又非一處可辦兼之該縣崇岡峻嶺舟楫不通少者肩挑背負多者車載驢駝兌漕之限恰在隆冬一遇雨雪滂沱山路崎嶇冰堅石滑難免傾覆撲跌之苦而傾覆在途之米泥污水浸不能交倉勢必盤回另換在賣主

刁難愈熾道路悲傷苦難盡述往往買粳到遲有誤兌限
官民交困非一日矣前蒙具題部議未允本道職司漕務
何敢坐觀民困況今

皇恩浩蕩各屬之以災傷見告者皆蒙蠲賑積年未完漕
項錢糧從未蠲免者皆蒙破格盡予蠲豁普天之下無不
徧沾恩澤又豈忍建邑一方有此向隅之泣今復據該縣
新任知縣茅成鳳具詳前來本道復查該縣錢糧全書內
原未開載粳米秬米字樣則粳米固可兌運秬米亦可兌
運米色雖有粳秬之不同其實至京通皆係老米並無高

廣德州志

卷五十

表疏

十八

下之分亦無粳秬分別貯廩之例況江南省安甯等屬俱
係秬米兌交而鳳淮等屬亦有純運粟米者又淮揚廬鳳
等屬漕米於康熙三十二年奉有隨其地方所出不論紅
白一體兼收之

俞旨此皆任土作貢因地制宜雖奉有建平縣粳米並非
改徵增收之部文然事有關地方不便於民者不得不隨
其變通伏讀康熙三十四年十二月十七日

恩詔內開直省地方現行事例不便於民者各該督撫詳
察開列具題欽遵在案今建邑漕糧米色不便於民請改

秈米兌運乃現行事例正與

恩詔相符所當亟請更正以甦民困以廣

皇恩憲德者也伏乞

恩賜會題等情呈詳到臣該臣看得建平縣歲額漕糧前

因該縣地土止產秈米無稷交兌採辦困苦不便於民經

臣據詳具題請以該邑土產秈米應兌因部臣以建邑稷

米並非改徵增收遵行年久無容議具覆以致未邀

俞允臣准部咨當卽檄行江安糧道轉行遵照在案今據

該道鮑復昌詳稱建平山僻小邑地不產稷歲輸漕糧正

廣德州志

卷五十

表疏

十九

耗四千餘石每屆開徵之期民將本地土產秈米易價遠
赴他郡採稷受高價指勒之害兼之崇岡峻嶺舟楫不通
肩挑背負實爲民困援引

恩詔復詳前來臣查起運漕糧江南安甯等屬秈米粟米

俱許兌運淮揚廬鳳又許其隨地方所出不論紅白一體

兼收此皆我

皇上本任土作貢因地制宜之遺意而特下

俞旨恩及萬民之成轍也今建邑產秈而必欲令其買稷

以致受困似與秈粟兌運紅白兼收之例獨不相符況稷

米秬米運抵京通皆一例支放如許以秬米交兌在國儲無虧於毫末而百姓實受福於無涯伏讀康熙三十四年恩詔地方現行事例不便於民者該督撫詳察開列具奏欽遵在案今建邑產秬兌稷實屬不便於民之事臣何敢因其遵行年久而竟不爲置議也仰祈

皇上軫念民艱允臣所請准以該邑本地土產秬米交兌一更易之間而闔邑羣黎永沐

皇恩於萬世矣臣謹會同江南江西總督臣范承勳安徽巡撫臣陳汝器合詞具題奉

廣德州志

卷五十

表疏

二十

旨該部議奏欽此欽遵抄出到部該臣等查得總漕桑格疏稱建平縣歲輸漕糧正耗秬米四千餘石每屆輸徵遠赴他郡採買該縣舟楫不通肩挑背負實爲民困請將該邑土產秬米交兌等因會同兩江總督范臣等具題前來查先據總漕桑請爲建邑秬米改徵秬米等因具題臣部以此項秬米並非改徵增收遵行年久將該督所題之處毋庸議等因覆准在案應將該督所題之處無容議可也康熙三十七年七月初八日題十九日奉旨建平縣改徵秬米於民有益着照該督等所題行

建邑漕糧辦梗苦累其來已久成鳳於戊寅春二月履任聞之未悉適庠生史綱以公事見言易秬之事綱與生員王化龍張灃戴宸岑遠并貢生宗瑛等謀之數年訖無成效因請余具詳余毅然任之指日爲誓於是綱及邑中士庶以劇陳民累等事呈縣成鳳卽繕文瀝敘辦梗之苦隨赴省面陳蒙糧憲鮑公洞悉民艱愷切眞摯見於詞色諭云文至已卽詳憲荷蒙恩賜具題今奉特旨改徵闔縣之民萬世永賴

洪恩出自

廣德州志

卷五十

表疏

二十一

聖明而諸生史綱等始事之心有不可泯者生員周元忠

韓祥生亦與議其間並載之

縣志

徵糧仍權用單頭始末

貢 震

江南催科之政積弊多端

國初沿明制每圖十甲輸設里長催糧雜派之多浮於正賦康熙中奉文禁革一切定爲順庄滾催之法下江州縣遵行已久而上江猶有未盡行者余嘗以建平之俗考之知非盡官吏之過蓋亦格於勢而有所不可行也何以言之順庄之法必先版圖版圖者一圖之田按魚鱗冊起某

字若干號止某字若干號履畝而勘中間爲田爲地爲山爲塌其土名四至積步處處與冊相符每圖字號若干爲田幾千幾百畝無溢額亦無缺額魚鱗冊所載業戶或傳之子孫分析幾家或售之他人更易數主查明現在執業之家逐號註明其間弓丈或有多寡址段或有分合亦詳悉記注舉其號數便知爲業戶某人之產按其址段便知爲鱗冊某號之田一圖之內田地山塌俱有着落推之數十百圖盡然縱有參差亦可截長補短使與鱗冊原數相合版圖既定然後可以抽敘抽敘者一家之產或在本圖

本甲或散布各圖各甲按之鱗冊逐號俱有業戶可稽抽而敘之歸於一人戶內總計實田若干科算銀米若干絲毫不得增減欺隱飛灑之弊不禁而絕由一圖推之數十百圖亦無不並然則通邑之田有定通邑之糧亦有定由是造徵冊設滾單挨順村庄花戶同在一單者非叔伯兄弟卽左右近鄰彼此傳催依限完納追呼可免有逾限不完者籤提比追懲一警百民不擾而糧可清矣順庄之法大要如此版圖則有經冊順田畝字號而以現在業戶注其下所謂址領戶也抽敘則有緯冊順村庄花戶而以該

管田畝列其後所謂戶領址也版圖以清通縣之田畝所以覈錢糧也順庄滾催以便業戶之輸將所以省差擾也立法之善至矣盡矣然不抽敘則無由順庄不版圖則無由抽敘此順庄之法所以必先版圖而其要在魚鱗冊建邑自康熙三年丈量後鱗冊藏於官者破爛無存於通邑田畝之盈縮多寡無從考校版圖順庄之法其能行乎今有田之家少自數畝多至數百畝叩以字號弓丈茫然不知也管糧之經承催糧之里長但據戶房推收冊每人名下舊管田若干新推新收田若干科算現年銀米若干而

其所據以推收者既無鱗冊號數實丈只憑賣田人撥票口號若干畝縮實輸糧其口號之數或田賤而急於求售則減或田昂而爭相購買則增至於縮實則有七折八折七五折不等亦視其田之貴賤與賣主之緩急強弱爲衡是以通邑之中或田多糧少或田少糧多或田已賣盡戶內尙有空糧或田有畱餘糧已盡歸他戶向來里長催納通圖皆有貼費遇有空畱子孫不能賠墊或并無子孫者俱係里長代完一旦去里長而用滾催此項空糧竟無着落此不可行一也且此地完糧率多祖戶往往有子孫數

家而仍一人之戶者又有本人向無祖戶而寄戶於親族者從前居址相連同此圖甲百年而後轉徙無常其戶名仍舊則其圖甲亦仍舊里長催糧零星錯雜遠近奔波爲累非淺然輪充里長者通圖止此十數家祖父相傳尙有圖簿可考卽有年少未諳猶可訪之故老知此糧現屬何人此人現居何地一旦去里長而用滾催則同此一單之戶有茫然不知爲何地之人何人之糧者鄉農目不識丁而給以滾單令其傳催或踰限不完或匿單不交勢所必至不完則滾催之法不行無異於不催也若盡如下江州

縣治以踰限匿單之罪則硃票縱橫籤差旁午深山僻壤之民將有不勝擾累者此不可行二也從前歷任奉文禁革里長專用滾催單雖設而不行特變里長之名爲單頭以爲陽奉陰違之計乾隆十二年白任不求其端不訊其末貿貿然革去單頭通邑圖甲由此都散幸是年丁地正銀適逢

恩赦僅徵耗銀二千七百餘兩迄今五載尙未完清而十三年錢糧至次年二月余到任時尙欠十分之三奏銷時民欠千餘兩幾無着落所以然者向來催糧之責在官則

有經催在民則有里長一經禁革彼不得不袖手事外而快壯兩班俱係募役從未經手錢糧民間又多祖戶朋完今令持籤到鄉各戶訪查既費周折而籤提之戶其錢糧早完清者又反居十之二三何也向惟衿戶錢糧及田多而曾充里長者乃能熟悉完糧條例其零星小戶皆歷年里長催收代完有不知本身錢糧應完在祖戶某名下者又有恐其完入祖戶而同產數家無從分別者於是各以本身名字完納卻與冊戶絕不相符櫃書收銀時但據銀封名字給照迨至查冊入數圖甲中並無此名已收之銀

竟無歸着又不肯即時查其的戶與爲清釐但將此號無着之銀綴於冊尾而冊中之戶仍然掛欠一至趕奏勢必籤提淳良者各自執串赴房查改而強項之民恃有糧串罵吏毆差肆無忌憚鄉里既羣言沸騰紳士亦多聚詬差役既空勞往返而糧戶爲之查改内幕爲之核對自二月至五月刻無甯晷而民欠尙存一千餘兩之多去里長而用滾催法非不善也而官民並累至於如此至十四年錢糧余初亦印發滾單單出月餘無人完納蒙本州曾前憲諭以單頭不可輕革滾單難以驟行之故於是仍用單頭

與滾單相輔而行其實滾單虛設專責單頭而十三年尾欠千餘兩亦着十四年單頭帶查帶催乃得稍有頭緒其中無田之糧勢不能併責之賠墊或其戶尚有子孫而貧無立錐或其戶久已故絕而推求房族孤兒寡婦差押到堂近屬遠親籤提應比追呼之擾不忍見聞至奏銷時尚有無着之銀十餘兩余爲墊解乃得結局十四年秋曾憲以憂去呂署州到任余爲指陳原委呂憲亦以本州錢糧前任查核兩年未得清楚遂以單頭催糧便於順庄稟明衛撫憲據以題請部議廣建催糧之法准照舊例行奉

廣德州志

卷五十

表疏

二十六

旨俞允於是仍用單頭而錢糧乃得年清年款矣

建平存稿後同

建平空糧由於買賣不清者雖係賠糧其田故在未爲大害也最害者莫如真正無田之糧沿河圩田一遇埂沃都爲沙磧必有二三十畝不可耕者此其一也埂旁無隙地可爲土場一遇修埂取土於田漸至變田爲塘又其一也以余所見汪北埂內有廢田五六十畝而梁家圩田八百至今可見耕者僅七十畝有奇楊賽圩內據土人言從前離埂五丈科糧沙水衝齧埂漸內移已無餘地而近埂一帶率爲大塘此等錢糧年年賠納終無了期建平之大害也然則順庄之法建邑必不可行乎非也從前鱗册不存田地號數弓丈無從查核故版圖抽敘之法一切難行自雍正九年迄乾隆八年兩次奉憲飭抄鱗册十三年曾前憲詳請司册到縣余臨任後設局大堂之西督各書陸續抄對於十六年冬告竣現在封貯內署縱未能全備所少無多而通邑已革之册書猶有册底民間所有之册互相考察補闕正訛以官册爲主訪求民間所有之册互相考察補闕正訛

則麟册猶為完物通邑田畝可取以為據也此房專
 司此事而稍知書算者不過兩三人既不足當此任從
 前里民册書積弊多端業已革除又知不便請復今清
 理田賦必先詳悉曉示通邑之使人紳士與鄉耆之樸
 受累無窮之故然後集老成以達誠使紳士與鄉耆之樸
 實而知書算者反覆面諭動以誠使人紳士與鄉耆之樸
 如疾病之在身不可一日安者然後每圖公舉兩人給
 以鱗册使之履畝查對其有册一本號而現在田分兩
 址者有册二本號而現在田併一坵者有現在是田而
 册則為山為地者有現在是田墳而册則為田者逐號詳
 悉註明更查現在何人執業完糧注於舊業戶之無糧
 此則田畝各業戶錢糧各完着落而向之有田無糧
 與田多糧少者令其照數免糧歸戶向之有糧無田與
 糧多田少者亦可照田減免糧科糧間有田之真無存
 而糧則年年賠累者縱不能詳請豁免一經清查定有
 溢額之田可以劃抵又不然詳明上憲攤派通邑四十
 餘萬畝之中為數無多事非難行如此則版圖定田賦
 清抽而敘之順庄可行矣余到任初前版圖定田賦
 廣德州志 卷五十一 表疏 二十七

滾催之法已經三載而滾單村庄又廢格不行訪其原委知
 通邑田賦既不能清滾單村庄又廢格不行訪其原委知
 意於地方殊不相宜是以仍用單頭止取便於催輸使
 錢糧不至貽誤然此心亟欲為地方清理田賦使順庄使
 之法可行而竣頭之累可去但其事不能待耳魚鱗
 圖册抄對未竣一也百年積弊一旦清釐在賠糧者固
 所樂聞而欺隱者必多阻撓地方官平時恩義未足以
 服人而臨時籌畫又不能盡善率爾舉動事必無成二
 也事體繁重需費不貲縣庫既無公項開銷派之里民
 則未見其利先覩其害又功令之所不許萬不可行惟
 望年豐人樂地方無事每歲割清俸之餘期以三年庶
 幾有成此其不能待三也今鱗册幸已告竣地方士
 民之情意相孚而去歲田畝中心之惓惓辦方望後之君
 璧之調此事遂已然三年中被災今夏辦方望後之君
 子為田賦為百姓免空糧倣照下江版圖抽敘之法不
 朝廷清田賦為百姓免空糧倣照下江版圖抽敘之法不
 地難奮然始窮矣

案順庄滾催立法甚良而限以地勢久未遵行廣德
建平並然貢令此篇敘次極詳特錄之以待畱心民
瘼者

以上胡志

自同治三年郡城克復後仍循舊章每圖設立單頭
每甲設一甲催輪流儻催十一年因各省墾戶甚多
並耕雜處土民既無從認識客民亦互相推諉乃仍
去單頭甲催現歸花戶自納

新纂